

QUÆSTIO MEDICA.

Quodlibetariis disputationibus manè discutienda in Scholis Medicorum die Jovis vigesima nona Novembris.

M. JOANNE ANTONIO BOURGAUD, Doctore Medico, Præsidente.

An in morbis melancholicis purgatio per inferiora?

BLANDISSIMUM vitæ condimentum sanitas: absque eâ nulla naturæ, nulla fortunæ bona; longius ab eâ recedit qui mente laborat, quam qui ægrotat corpore. Cunctis hominibus eadem animæ perfectio. Ingenii varietas ab organorum conformatione & humorum dispositione pendet, sicut morborum diversitas. Tenuis humor ut plurimum acutos parit, crassus chronicos. Inter chronicos reponitur melancholia, quæ mentis alienatio est cum metu & tristitia. Hunc affectum generat cerebri dispositio cum pravâ sanguinis indole & partium inferiorum vitio. Suspendium frequens, somnia terribilia, silentium, demissio animi, desidia, hebetudo, oblivio, lucis fuga, contemptus rerum omnium hanc comitantur ægritudinem. Hæc omnia arguunt crassioris ac terreni humoris dominium.

ANIMÆ proprium est cogitare. Inter eam & corpus insigne societatis vinculum. Ex diversis partium corporis motibus variæ exurgunt in animâ cogitationes, & vice versâ distinctæ cogitationes distinctos motus edunt in corpore. Mutuus ille concursus ex summi Opificis decreto proficiscitur. Animi pathematis occasionem præbet humorum natura. Gaudium à laudabili sanguine & mediocriter subtili, dum blando ejus motu cerebrum placide commovetur, unde grata animæ cogitatio. Furor, ira, audacia, rapidissimum bilis motum sequuntur. Mæstus & tristis est qui non posse se putat imminens malum arcere, aut optatum bonum consequi, propter imbecillitatem virium, motus inertiam, membrorum segnitiam. Unde hæc nisi ab humore melancholico vix mobili spiritus obtundente.

CORPUS humanum ex infinitis pene numero canaliculis unum efficitur. Per hos varii liquores trajiciuntur quorum alii utiles, alii excrementitii: illos sursum si tenues, deorsum si crassi, natura propellit. Ne credas tamen partes infernas spiritui orbi, hic actionum cujuslibet partis primus auctor. Inter liquores corpori inservientes debent esse temperies, partium moles, quantitas recto usui consona; secus corporis æconomiam interturbant. Morbi natura, partium conditio, earum situs, indicant remedia formam, quantitatem, & quâ viâ sit eliminandus humor. Debet medicus naturæ minister & imitator illius motum sequi: si tenuis humor, si peccat, tum per habitum corporis, quo fertur, tum per superiora est abigendus, crassus tantum per inferiora.

QUO vividior alicujus corporis motus eo magis à centro recedit, motus sui impedimenta facilius superat, & lineam rectam describit: unde sanguinis è sinistro cordis sinu prorumpentis tenuior portio ad caput avolat, crassior pellicitur ad inferiora. Hujus terreni succi sedes est ac receptaculum lien ac mesenterium cum eorum vasis. His obstructis moles sanguinea à succo melancholico non repurgatur, hinc circuitu sanguinis fæx illa rapitur ad diversas partes in quibus tam multa generat symptomata. Tot malorum curationem, natura monstrante viam, prudenter aggreditur qui confugit ad catharticum, sectâ prius saphenâ; hac semitâ quâ sponte fertur crassus humor citius, tutiusque foras educitur.

OBSCURE loquitur qui catharticum sympathiâ aut antipathiâ agere contendit; clarius qui affirmat idem irritando purgare, & novam excitando in humoribus fermentationem. Emeticorum & cathartico-rum actio discrepat, quod illorum evolutio fit in ventriculo; horum dissolutio inchoetur in stomacho, perficiatur in intestinis. Emetica constant particulis tenuibus & effertis, motuque concitatissimo præditis cerebrum lædunt vehementi concussionem, partibus superioribus humorem melancholicum impingunt potius quam ex iis eliminant ob angustiores meatus vacuandis succis crassioribus ineptos. Puta vomitum esse motum ventriculi non naturalem: is nunquam suscitatur absque periculo. Quæ per inferiora purgant, minorem vim inferunt corpori, humoris vacationem naturæ consentaneam moliantur per vias corporis patentiores, aptioresque expulsionem crassioris excrementi: à principibus partibus humorem noxium remonent, sedem morbi oppugnant in abdomine sitam; hinc melancholiâ percitis, apertio saphenæ, quæ corpus à crasso sanguine repurgat, proficua: sicut hæmorrhoidum fluxus morbos melancholicos soluit.

Ergo in morbis melancholicis purgatio per inferiora.

DOMINI DOCTORES DISPUTATURI.

M. Ludovicus Labbé, Botanicus Professor.

M. Andreas Engueard.

M. Iosephus Thomasseau.

M. Ludovicus Poirier.

M. Petrus Bonnet.

M. Ioannes Baptista Moreau, Professor Regius.

M. Petrus de Merfenne.

M. Ioannes Garbe.

M. Paulus Courtois, Professor Regius.

Proponerat Parisiis ANTONIUS VARIN, Parisinus Baccalaureus Medicus. A. R. S. H. 1685.

